

Headline	Al-Sultan Abdullah Canselor UiTM	Language	Melayu
Media Title	Berita Harian	Section/Page No	Dasar & Pentadbiran/ 6
Date	20/03/2019	Journalist	-
Source	Surat Khabar	Remarks	UiTM

Al-Sultan Abdullah Canselor UiTM

[FOTO BERNAMA]



Al-Sultan Abdullah bertitah pada Istiadat Pemasyhuran sebagai Canselor UiTM di Shah Alam, semalam.

Shah Alam: Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Sultan Haji Ahmad Shah Al-Musta'in Billah semalam, dimasyhurkan sebagai Tuanku Canselor Universiti Teknologi MARA (UiTM).

Watikah pemasyhuran dipersembahkan oleh Menteri Pendidikan, Dr Maszlee Malik pada Majlis Istiadat Pemasyhuran Tuanku Canselor UiTM di Dewan Agong Tuanku Canselor, di sini.

Dalam titah baginda, Al-Sultan Abdullah menzahirkan rasa bangga atas pemasyhuran sebagai Canselor sebuah institusi pendidikan tinggi yang terbukti mempunyai sejarah perjuangan cukup istimewa, khususnya dalam membina kecemerlangan dan jati diri bangsa Melayu dan Bumiputera, serta melestarikan darjat dan martabat bangsa melalui pendidikan tinggi.

"Universiti ini sudah sekian lama berperanan melahirkan modal insan Bumiputera berkualiti dan berjasa kepada negara, hendaklah terus mengekalkan visinya, memberi penekanan kepada kelestarian serta kelangsungan bangsa Melayu dan Bumiputera dalam bidang pendidikan, bagi menentukan Bumiputera terus unggul dalam se-

mua bidang profesional bertaraf dunia," titah baginda.

Baginda bertitah, bagi menentukan bangsa Melayu dan Bumiputera berdaya saing pada pentas global, universiti itu perlu menyediakan pengajian yang mengkaji pemikiran, kepintaran serta budaya kepelbagaian bangsa yang merentasi zaman sebagai bekalan untuk memartabatkan bangsa, tanpa merubah identiti dan matlamat asal penubuhannya.

Pusat perkembangan ilmu

Sambil mengingatkan UiTM sebagai pusat perkembangan ilmu dan tamadun yang melahirkan cerdik pandai, turut mempunyai tanggungjawab besar menyemai nilai integriti dalam usaha melahirkan graduan berkualiti tinggi, Seri Paduka bertitah, kepemimpinan yang beretika dan berwibawa akan menjamin kecemerlangan organisasi.

Al-Sultan Abdullah turut meminta rakyat Malaysia mengelakkan tingkah laku, mahupun pertuturan yang boleh mengakibatkan berlakunya perpecahan dan perbalahan serta fitnah dan hasad dengki, yang hanya akan mengundang kemusnahan kepada tamadun bangsa dan kemajuan yang sudah sekian lama terbina.